

K 204.3
1

興文署新刊資治通鑑序

古今載籍之文存於世者多矣苟不知所決
擇而欲遍觀之則窮年不能究其辭沒世不
能通其義是猶入海弄沙成功何年善乎孟
子之言曰堯舜之智而不遍知急先務也大抵
士君子之學期於適用而已馳騁乎高遠陷

溺乎異端放浪於詞華皆不足謂之學矣易

曰君子多識前言往行以畜其德說命曰

學古入官議事以制政乃不迷若此者可謂

適用之學矣前脩司馬文正公遍閱歷代

舊史旁採諸家傳記刪繁去冗舉要提綱纂

成資治通鑑二百九十四卷上起戰國下終

五季一千三百六十二年之間賢君令主
忠臣義士志士仁人與邦之遠略善俗之良
規匡君之格言立朝之大節叩函發帙靡不
具焉其於前言往行蓋並畜而不遺矣其於
裁量庶事蓋擬議而有准矣士之生也苟無
意於斯世則已如其抱負器業未甘空老明

時將以奮發而有為也其於是書可不熟讀而深考之乎

朝廷憫庠序之荒蕪歎人材之喪失乃於京師勅立興文署署置令丞并校理四員咸給祿廩召集良工刻刻諸經子史版本頒布天下以資治通鑑為起端之首可謂

知時事之緩急而審適用之先務者矣噫
遐鄉小邑雖有長材秀民嚮慕於學而無
書可讀惘然以空老者多矣是書一出其
為天下福澤利益可勝道哉昔杞上老
人出袖中一書而留侯為萬乘師穆伯長
以昌黎文集鏤板而天下文風遂變今是

書一布不及十年而

國家人材之盛可拭目而觀之矣翰林學

士王磐序

資治通鑑序

御製

朕惟君子多識前言往行以畜其德故能剛健篤實
輝光日新書亦曰王人求多聞時惟建事詩書春秋
皆所以明乎得失之迹存王道之正垂鑑戒於後世
者也漢司馬遷紬石室金匱之書據左氏國語推世
本戰國策楚漢春秋采經撫傳罔羅天下放失舊聞
考之行事馳騁上下數千載閒首記軒轅至于麟止
作爲紀表世家書傳後之述者不能易此體也惟其
是非不謬於聖人褒貶出於至當則良史之才矣若

稽古

英考留神載籍萬機之下未嘗廢卷嘗命龍圖閣直
學士司馬光論次歷代君臣事迹俾就祕閣繙閱給
吏史筆札起周威烈王訖于五代光之志以爲周積
衰王室微禮樂征伐自諸侯出平王東遷齊楚秦晉
始大桓文更霸猶託尊王爲辭以服天下威烈王自
陪臣命韓趙魏爲諸侯周雖未滅王制盡矣此亦古
人述作造端立意之所繇也其所載明君良臣切摩
治道議論之精語德刑之善制天人相與之際休咎
庶證之原威福盛衰之本規模利害之効良將之方

略循吏之條教斷之以邪正要之於治忽辭令淵厚
之體箴諫深切之義良謂備焉凡十六代勒成二百
九十六卷列于戶牖之間而盡古今之統博而得其
要簡而周于事是亦典刑之總會冊牘之淵林矣苟
卿有言欲觀聖人之迹則於其粲然者矣後王是也
若夫漢之文宣唐之太宗孔子所謂吾無閒焉者自
餘治世盛王有慘怛之愛有忠利之教或知人善任
恭儉勤畏亦各得聖賢之一體孟軻所謂吾於武成
取二三策而已至于荒墜顛危可見前車之失亂賊
姦宄厥有履霜之漸詩云商鑑不遠在夏后之世故

賜其書名曰資治通鑑俾著朕之志焉耳

治平四年十月初開

經筵奉

聖旨讀資治通鑑其月九日臣光初

進讀

面賜

御製序令候書成日寫入

新註資治通鑑序

古者國各有史以紀年書事晉乘楚檮杌雖不可復見春秋經聖人筆削周轍既東二百四十二年事昭如日星秦滅諸侯燔天下書以國各有史刺譏其先疾之尤甚詩書所以復見者諸儒能藏之屋壁諸國史記各藏諸其國國滅而史從之至漢時獨有秦記太史公因春秋以爲十二諸侯年表因秦記以爲六國年表三代則爲世表當其時黃帝以來謀記猶存具有年數子長稽其歷譜謀終始五德之傳咸與古文乖異且謂孔子序書略無年月雖頗有然多闕夫

子之弗論次蓋其慎也子長述夫子之意故其表三代也以世不以年汲冢紀年出於晉太康初編年相次起自夏殷周止魏哀王之二十年此魏國史記脫秦火之厄而晉得之子長不及見也子長之史雖爲紀表書傳世家自班孟堅以下不能易雖以紀紀年而書事略甚蓋其事分見志傳紀宜略也自荀悅漢紀以下紀年書事世有其人獨梁武帝通史至六百卷侯景之亂王僧辯平建業與文德殿書七萬卷俱西江陵之陷其書燼焉唐四庫書編年四十一家九百四十七卷而王仲淹元經十五卷蕭穎士依春秋

義類作傳百卷逸矣今四十一家書存者復無幾乙部書以遷固等書爲正史編年類次之蓋紀傳表志之書行編年之書特以備乙庫之藏耳宋朝英宗皇帝命司馬光論次歷代君臣事迹爲編年一書

神宗皇帝以鑑于往事有資於治道賜名曰資治通鑑且爲序其造端立意之由溫公之意專取關國家盛衰繫生民休戚善可爲法惡可爲戒者以爲是書治平熙寧間公與諸人議國事相是非之日也蕭曹畫一之辯不足以勝變法者之口分司西京不豫國論專以書局爲事其忠憤感槩不能自已於言者則

智伯才德之論樊英名實之說唐太宗君臣之議樂
李德裕牛僧孺爭維州事之類是也至於黃幡綽石
野猪俳諧之語猶書與局官欲存之以示警此其微
意後人不能盡知也編年豈徒哉世之論者率曰經
以載道史以記事史與經不可同日語也夫道無不
在散於事爲之間因事之得失成敗可以知道之萬
世亡弊史可少歟爲人君而不知通鑑則欲治而不
知自治之源惡亂而不知防亂之術爲人臣而不知
通鑑則上無以事君下無以治民爲人子而不知通
鑑則謀身必至於辱先作事不足以垂後乃如用兵

行師創法立制而不知迹古人之所以得鑑古人之
所以失則求勝而敗圖利而害此必然者也孔子序
書斷自唐虞訖文侯之命而繫之秦魯春秋則始於
平王之四十九年左丘明傳春秋止哀之二十七年
趙襄子蒞智伯事通鑑則書趙興智滅以先事以此
見孔子定書而作春秋通鑑之作實接春秋左氏後
也溫公徧閱舊史旁採小說抉擿幽隱薈粹爲書勞
矣而修書分屬漢則劉歆三國汔于南北朝則劉恕
唐則范祖禹各因其所長屬之皆天下選也歷十九
年而成則合十六代一千三百六十二年行事爲一

書豈一人心思耳目之力哉公自言修通鑑成惟王
勝之借一讀他人讀未盡一紙已欠伸思睡是正文
二百九十四卷有未能徧觀者矣若考異三十卷所
以叅訂羣書之異同俾歸于一目錄三十卷年經國
緯不特使諸國事雜然並錄者粲然有別而已前代
歷法之更造天文之失行實著於目錄上方是可以
凡書目錄觀邪 先君篤史學淳祐癸卯始患鼻衄
讀史不暫置灑血漬書遺跡故在每謂三省曰史漢
自服虔應劭至三劉注解多矣章懷注范史裴松之
注陳壽史雖閒有音釋其實廣異聞補未備以示博